

Депутатин хаалгъ

Хѳри зургъан джилин эргид медрл, ухагъан дорас ѳсдж йовх бичктѳдт нерадлгън--сѳахн хаалгъ. Эн цагин туршд кедѳ байрлх юмн, кедѳ зѳвѳрлх юмн ѳзгдв. Зѳрмдѳн дегд кѳчр болхла, шин эклджѳх багъ багш, сѳѳнь дуусн унтл-кевтл уга, цааранднь ягъдж кѳдлхѳн са-над ухалад суудг билѳ...

Лидия Сергеевна Голубева 1931-ч джил Астраханск педтехникум чилѳгъад, хальмг танъгъч тал йовулгдсн мѳн. Тиигхд мана хальмгин теегѳр культштурм" —гидж ик кѳдлмш кегдсн болдг. Голубева комсомолк бѳѳсн учрар Элст балгъснд методистк болдж, хальмгудин медрл-сургъуль ѳѳдлѳллгънд дѳнъ-нѳкд кѳргхд илгѳгдсн.

Тѳрѳн ѳдрмѳд иир кѳчр билѳ. Шин газр, шин ѳмти, ташр деернь багъ насн. Эк эцкѳсн салдж, хол газрт йовад уга хѳртѳ кѳѳкнд, герѳсн ууджмд кѳдлмш эклдж келгън бас кѳчр юмн.

Болв Лидия Голубева ирсн даругъан Павлов Дордж, Беглеев Гола эднлѳ таньлдв. Эн кѳвѳд насарн багъ болдг болв чигн, эврѳннь газр-усан, келн ѳмтѳн сѳѳнѳр меддг учрар Лидия Сергеевнад дѳнъ-нѳкд болв.

Тиигдж кѳдлмшѳн эклсн багш, эндр ѳдр Элст балгъсна хамгин кѳндтѳ кѳуунѳ тоод бѳѳнѳ.

Мана Хальмг танъгъч депутатд кандидатир сунъгългънд Элстин ѳмтс хамгин тѳрѳн болдж Голубева Лидия Сергеевнаг сунъгъхми гидж шиидв.

Тер учрта. Лидия Сергеевна цаган чигн ѳрвлл уга, чидлѳн чигн нѳл уга олна кѳдлмшд орлна. Дакад болхла эн багшин гарт сурсн кѳвѳд-кѳѳкдѳс мана тѳрскнд цань уга итклтѳ цергчир тѳрскн нутган харсгч дѳѳнѳ цагла гарсми. Ѳлгѳрнь келхд, Юрий Клыков, Борис Алехин хойр, мана хальмгин баатр ѳрдѳд Хахлинова Тамара, Коснев Владимир, Адучиев Бадм эднлѳ хамдан геронческ ѳѳлдвр гаргъад, немшин гарар алгдсн мѳн. Тинм зѳргтѳ, баатр, ѳнн седклтѳ багъчуд ѳсклгънд Лидия Сергеевна чигн эврѳннь медрл-кѳчѳн ѳгсн зѳвтѳ.

Эн кѳндтѳ багшин оln сургъульчирнь бас эндр ѳдр бийлѳнъ хамдан кѳдлдж йовцхана. Нина Игнатъевна Цикалова литературин багш болдж 1-ч дундин школд кѳдлдж бѳѳнѳ. Полоусов Степан Григорьевич—Элстин банкин ах тооч, Немечев Иван Степано-

вич—школин директор, Поволоцкая Галина Филипповна—школин багш. Нань чигн кесг олн эн багшин гарт дассн ѳмтс мана хальмгин теегѳр болн Советск Союзар кѳдлдж йовцхана.

Шидр Элстин улид нег ик байрта ѳѳлдвр болв.

Дивн—Элст хоорнд йовдг автобус Астраханск улицѳс барун талан эргѳд, Элстин гостиницин ѳѳр ирдж зогсв. Ѳѳдн сѳкгдѳд, ѳмтн дотраснь гарч бѳѳсн цагла, хойр эмгн буучкад, ѳвдглдж суугъад тѳрсн газран ѳмсв, Тедѳкнд, гартан сумкта йовсн кѳѳкд-кѳн энѳг ѳзчкѳд, гѳѳдж ирѳд, хойр эмгиг босхла хойрагъинь кѳзѳддж теврѳд ѳмсв. Эн кѳѳкд кѳн—багш Голубева билѳ.

—Би хальмг ѳмтид цань уга дуртав,—гидж Лидия Сергеевна манд келв.—Мана алдр Коммунистическ партъ зѳвитн йилгъѳд, газр-усидтн авч ирсн—маднд, тадна ах-дѳ орс улсд, дегд ик маш байр болджана. Ода цугъар хамдан эдл-ахуган болн сургъуль-эрдмѳн ѳѳдлѳлдж цецгѳрѳлхми.

Лидия Сергеевна Голубева—эндр мана Танъгъчин ѳнтѳ депутат.